


逆臣傳 二上



漢書門

一	二	三	四	五	六	七	八	九	十
---	---	---	---	---	---	---	---	---	---

內閣文庫	
番號	漢 2304
冊數	20 ( 19 )
函號	290 42



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



日馬圖

逆臣傳卷下

曾養性列傳 劉秉政附 天庫

曾養性率天人初從耿繼茂征廣東靖  
南王藩下累官副都統繼茂移藩福建養  
性從破海賊於廈門康熙十一年授藩下  
交養總兵官十三年三月耿精忠及巡撫  
劉秉政從逆精忠以養性為偽都督連陷  
福寧諸州縣養性率賊萬餘犯浙江之平

逆臣傳卷下

陽遊擊司定猷縶總兵蔡朝佐迎降遂據  
平陽五月潛師渡飛雲江攻瑞安不下轉  
踰桐嶺遊擊魏萬侯迎戰敗死養性進屯  
温州城外西山六月温州鎮總兵祖宏勳  
通賊巡道陳衷赤永嘉縣知縣馬璵遇害  
養性入據城偽加宏勳威遠將軍聚衆十  
萬趨台州過樂清攻破之長驅下天台仙  
居及紹興之嵊縣布偽劄寧海象山新昌

餘姚之寇蜂起養性偽授魯朝全爲總兵  
褚楚白都督使踞大峯山擾紹興寧波養  
性分遣賊犯金華自犯黃巖九月黃巖陷  
總兵阿爾奉從賊十月養性偕偽都督周  
烈等率賊二萬自常山犯衢州將軍賚塔  
總督李之芳分路奮擊大破之十一月復  
犯衢州仍敗之十二月養性偕偽總兵徐  
尙朝等率馬步賊三萬土寇二萬攻金華

副都統瑪哈達總兵陳世凱迎戰於積道  
山破其水城殺賊二萬餘養性退據天台  
十四年三月養性率僞總兵八人騎六千  
步卒數萬南至長石嶺北至三江綿延數  
十里連屯二十五營復遣賊朱飛熊率水  
師萬餘舟三百餘艘泊小梁山下四月將  
軍傅喇塔進擊之陣斬飛熊養性退據茂  
平嶺扼險抗拒五月巡道許宏勳紹興協

都司王得福勦九嵐山賊招降楚白斬朝  
全養性失援八月傅喇塔自土木嶺間道  
濟師出茂平嶺背賊驚潰乘勝趨黃岩養  
性棄營據城拒守傅喇塔進圍其城養性  
夜突圍走温州餘賊以城降乘勝復樂清  
從柁濱沿山至青田渡江向温州養性遣  
賊拒戰於土塘轉戰至線障設伏橫擊之  
賊首尾不相顧潰走養性乃濬温州城河

拆民居增戰具固守不下傳刺塔先營上山令諸軍謹守隘口及曙分兵下山奮擊陣斬偽都督孫可得偽總兵李節等賊大敗追至將軍橋及灰橋扼其歸路賊盡墮水中斬首二萬餘養性墮馬浮水逃入城困守不能復出九月養性聞大兵入福建精忠降勢迫無所歸十月朔率衆以城降十二月自温州率兵至福州仍爲藩下總

兵官聚忠疏劾精忠並劾養性旋隨精忠還京二十一年正月養性磔死宏勳定猷並伏誅劉秉政漢軍正紅旂人初爲直隸雞澤知縣順治九年行取授雲南道監察御史十五年遷太僕寺少卿十六年轉左通政尋擢寧夏巡撫康熙四年裁缺五年補福建巡撫附精忠同謀逆後從精忠乞降逮赴京師道病死籍其家

劉進忠列傳

劉進忠遼東人初爲明總督馬得功部校  
本朝順治二年隨得功在蕪湖迎降旋從  
勦福建海賊游摺靖南王藩下右路鎮標  
副將康熙三年遷隨征福建中路總兵官  
六年改廣東水師左路尋擢廣西左江八  
年復調廣東潮州十三年四月進忠潛通  
耿精忠擁兵叛先是進忠聞滇閩有變遂

萌異志遣其心腹楊希震迺福州納款獻  
潮州地並請假將軍印以號召時續順公  
沈瑞駐潮知其謀遊擊李成功張善繼亦  
密約共圍進忠至是沈瑞舉兵巷戰兵敗  
成功等被殺精忠使漳浦鎮總兵官劉炎  
統兵至勢益張進忠受寧粵將軍偽職並  
執瑞及副都督鄧光明官兵家屬盡驅入  
福建拘于漳浦七月逆黨陳莫據程鄉入

月劉斌據普寧先後爲都統尙之孝等所  
其城之孝兵抵潮進忠窺其移營輒  
率衆出犯之孝敗之於新亨分兵克東津  
筆架山洗馬橋諸隘巡撫劉秉權總兵王  
國棟亦攻毀潮州城南鳳凰洲木城斬僞  
都督金漢臣合圍潮州十四年海逆鄭錦  
寇漳泉拔之與精忠有隙聞粵路梗進忠  
因再用希震策納欵於錦錦遣僞總統劉

國軒引賊助掠僞投進忠伯爵之孝與戰  
不利退守惠州十五年精忠降進忠仍擁  
衆觀望十六年三月福建旣定康親王傑  
書奏以將軍瑪哈達都統賚塔統兵同精  
忠進取潮州進忠竊迫歸順

上命宥進忠罪仍爲潮鎮總兵官隨大  
兵進勦尋授征逆將軍六月疏言臣以遼  
東武人歷擢潮鎮曷敢一旦背叛自取滅

門實由續順公部下都統鄧光明等見臣  
訓練頓生謗誹乃約遊擊李成功張善繼  
率兩路兵馬抄臣前後礮矢如雨臣倉卒  
應變亦站隊堵禦死亡之際不暇擇人走  
險求救苟延歲月及聞康親王奉  
命到閔私幸得瞻

天日差可遠輸誠款雖屢經鄭逆調遣臣  
皆按兵不動抑且漳泉兵食全資惠潮臣

隨嚴禁接運所以漳泉之衆不戰自餒今  
幸邀

聖明赦愆復職又加臣爲征逆將軍仍帶  
伯銜可謂榮出非分自今以往臣之性命  
身家均爲

皇上再造者若不據實陳情是臣旣誤於  
前又復隱諱於後殆必歸誠之心未堅報  
効之志未切臣雖萬死不足贖矣疏入報



通吳三桂召兵自救爲尙之信上

聞

諭曰劉進忠心懷詭譎非實意歸誠可檄  
康親王密爲之脩尋又

命調其標兵勦賊移進忠福州十七年令  
來京其標員率兵赴廣西効用十九年精  
忠爲部下徐鴻弼舉發罪狀事涉進忠有

與進忠密談結爲心腹語遠問得實

詔與精忠同磔於市

尙之信列傳

尙之信漢軍願藍旂人平南王尙可喜長  
子初隨父鍾所年十九可喜遣入侍

世祖章皇帝念可喜功多授之信秩與公  
爵同康熙十年

聖祖仁皇帝允可喜請令之信赴廣東佐

世宗憲

卷下

八

理軍事之信別營新宅以居十二年可喜  
欲歸老遠東請以之信襲封留鎮部議藩  
臣無乞休予襲之例令撤藩偕歸會逆藩  
吳三桂反可喜奉  
詔留鎮遣次子之孝討叛賊劉進忠於潮  
州奏請以之孝襲封  
詔可喜如舊理事俟賊平以之孝襲旋晉  
可喜平南親王之孝平南大將軍

命之信以討寇將軍銜協謀征勦未幾高  
州總兵祖澤清附三桂據城叛引廣西叛  
賊馬雄郭義及三桂所遣偽將軍董重民  
李廷棟王洪勳等連陷廣東郡邑海賊鄭  
錦遣賊萬餘助進忠入寇之孝戰失利退  
駐惠州十五年春可喜卧疾之信代理事  
三桂誘其屬人從逆水師副將趙天元總  
兵孫楷宗相繼叛之信遂降三桂遣腹心

環守可喜藩府戒毋得閑白諸事殺金光  
以徇金光者浙江義烏人隨可喜幕下贊  
謀畫策最久可喜曾以其擒拘山鎮奸民  
江鵬處得

旨叙功授鴻臚寺卿銜嘗以之信凌虐藩  
屬不可襲封告可喜者也之信遂受偽職  
招討大將軍輔德公與海賊議和奪之孝  
兵柄使閑居廣州三桂屢脅之信出藩屬

抗大軍之信賂以庫金十萬乃已可喜卒  
三桂以輔德親王偽印與之信之信旋遣  
使赴江西通欵大軍密疏願立功贖罪奉  
諭曰尔父航海歸誠功猷茂著自吳逆叛  
亂以來益矢忠藎故特封爲親王授尔爲  
討逆將軍正期克奮勇畧掃除逆賊不圖  
粵省變亂道路梗阻今覽尔密奏稱父子  
世受國恩斷不敢懷異志念篤忠貞因倉

卒生變朕心深爲憫惻已往之罪概行赦免果能相機勦賊立功自効仍加恩優叙  
十一年春之信請

勅大兵進粵時三桂以董重民爲偽總督  
踞肇慶初廣西蛋戶謝厥扶從趙天元叛  
以繪船數百附馬雄誘天元降賊至是三  
桂合厥扶統轄水師加僞職定海將軍與  
重民合拒大軍之信密約重民所部兵令

以缺餉謀乘間擒重民遂擊厥扶大敗之  
厥扶遁入海之信遣副都統尙之瑛率兵  
迎大軍駐韶州疏陳閣屬歸正並言藩下  
總兵僞授翼勇將軍王國棟藩下長史僞  
授總兵李天植等襄贊有功並得

旨嘉獎下部議叙議之信襲封平南親王  
國棟等各授藩職俟諸路賊平再議

諭之信曰今據時勢勦賊吳三桂甚爲緊

要正宜趣兵速進前此賊兵屯聚長沙掘  
壕立椿僅可支持旦夕誠使諸路進兵彼  
安能隨處脩設椿壕以相抗其滅亡可翹  
足而待矣尋之信遣使入貢

諭曰昔尔先人在時貢獻方物靡不竭誠  
二年以來粵東事變信使勿通每念及尔  
先人素曰忠貞不二爲國忘家罔不憫傷  
今王克承先志恢復粵東使人遠來貢獻

良屬可嘉但用兵之秋非無事時比朕見  
此物不勝思念尔先人王其安戢粵東恢  
復粵西湖南以紹尔先人未盡之志朕心  
深爲期望此等細務勞人費事其暫止是  
年秋三桂從孫世琮踞桂林之信遣總兵  
尙從志以兵三千隨巡撫傅宏烈進征宏  
烈擊敗僞將軍趙天元復梧州潯州窺取  
平樂桂林

詔之信由韶州進取宜章郴州永州之信  
疏言粵東土賊尙多潮惠人心未定臣宜  
留鎮省城得

旨令將軍瑪哈達賚塔統兵至潮州劉進  
忠等已歸順海寇敗遁尙之信又以土寇  
爲辭留駐省城倘逆賊各路來犯不惟廣  
西難復楚賊難滅卽廣東亦難保矣其速  
統兵前赴韶州勦賊時鎮南將軍莽依圖

擊敗僞將軍胡國柱馬寶於韶州

韶發師梧州因之信未具舟楫師行濡滯

總督金光祖由潯州進征世琮弗勝

諭責之信曰金光祖不守梧州輕進失利

猶幸梧州無虞萬一梧州失利則進取三

桂大軍後路亦阻前調將軍莽依圖等赴

梧州王不亟發船致誤師行不可謂非王

坐失機宜也梧州乃兩廣接壤要地其卽

遣精兵戍守十七年正月之信疏言臣奉命進取宜章郴永行至清遠以總督金光祖及高州諸處報警遂還省城今海寇又突犯潮陽臣未能統兵遠征得

旨潮州惠州既有將軍賚塔等鎮守勦海寇不爲不足今將軍莽依圖深入廣西事機所係甚重且廣西早定則湖南之寇不能自存王其親往廣西策應毋誤軍事之

信復疏言高雷廉三郡初定恐爲逆賊煽惑再四熟籌不得不留鎮省城

詔精選藩兵遣發暫停親往之信遣國棟率兵赴宜章九月疏言前者永興危急臣恐國棟不能制賊擬親往策應頃聞吳三桂已死永興賊迫湖南勢危瓦解臣當進定廣西

詔以之信爲奮武大將軍合永興大兵並

進十八年大兵自湖南進廣西趙天元降  
之信疏言前見粵東之變起自口門江門  
水師之叛倡於趙天元請明正其罪  
詔卽誅之時世琮寇擾南寧之信旣次橫  
州進駐詔封俄復還廣州自陳患痔日劇  
有事醫療

詔移其部衆與莽依圖統攝之信令藩下  
總兵時應運率之往莽依圖已擊敗世琮

將進征桂林留應運駐守南寧賊党范齊  
韓黃明等竄踞武宣之信疏陳海寇宜防  
未能西勦

上復諭趣之十九年三月之信乃率兵西  
行初之信旣襲爵以之孝舊握兵爲嫌不  
欲其居廣州奏請

召赴京師之孝旋自請募兵三千効力得  
旨赴江西勦賊藩屬苦之信殘暴念之孝



弗置之信素猜忌嗜酒怒輒執佩刀擊刺  
又好以鳴鏑射人叛將孫楷宗之歸順也  
上宥其罪之信杖斃之護衛張永祥爲之  
信齋疏至京

召對承

旨以總兵權用之信故阻抑復屢辱以鞭  
箠怒護衛張永祥選語忤射之殘其足諸護  
衛皆不平國棟時爲藩下都統與副都統

尙之璋總兵甯天祚每與語憤形於色巡  
撫金雋察其情疏請

諭趙之信西勦留國棟之璋天祚守廣州  
至是之信赴武宣永祥士選詣

闕首之信跋扈怨望弗願勦賊糜兵餉擅  
殺人諸罪狀

上命吏部侍郎宜昌阿以巡視海疆赴潮  
州傳

臣等傳

卷下

七

諭將軍賚塔移師廣州綏輯藩屬先傳  
諭王國棟等如能執之信許便宜行事並  
以罪不株連宣

諭藩屬四月宜昌阿至廣州國棟與金雋  
密議選藩下兵以叅領李文科率之馳詣  
總督金光祖提督哲爾肯副都統金榜選  
總兵班際盛宣

諭協擒之信金雋上疏曰自滇黔叛亂以

來兵民殞於鋒鏑財賦竭於軍需

皇上夙夜焦勞於今七載吳三桂固爲亂  
首而尙之信實爲亂源何則之信兇殘暴  
虐賦性豺狼其父可喜深慮其包藏禍心  
戕害諸弟因有移歸遼東之請三桂卽藉  
徹藩倡亂耿精忠效之羣逆蜂起皆之信  
啓其端也可喜復慮其擁兵速禍故請以  
次子改襲使之信稍有人心當必悔罪效

忠顧乃倚賊生亂梟斬鴻臚寺卿金光投  
順三桂冀爲僞王以逞驕志及三桂與以  
輔德公僞冊印又遣馬雄屯三水索助餉  
銀十萬兩始頽然氣沮而謀歸正  
天恩待以不死俾襲父爵更宜撫心知愧  
奮志圖功乃不赴潮州征勦不救永興危  
急抗違  
詔命養賊鄰封且以奉

命名罪之孫楷宗擅于杖斃目中尙有三  
尺法乎臣猶憶十七年九月公讞之信語  
督臣金光祖云

上欲我出兵乃不與我一黃頂帶翌日復  
讞怒責鹽驛道僉事李毓棟云爾甫來此  
事事與我違拘我一刀斫爾

上亦無奈我何昨歲七月讞罷私語臣曰  
非我歸正尔安能至廣東凡事當順從我

不獨吳三桂能殺巡撫朱國治也臣正色叱之乃以酒醉自解其狂悖無忌憚如此昔可喜將終曰必葬我海城之信置若罔聞惟營造藩府終歲不輟其意寔欲久踞廣東不忠不孝路人皆詈之耿精忠棄邪歸正遣子入侍之信三子皆年出有室臣謂入侍不容緩之信曰天下未定豈宜令孩童遠行是則異志猶存叛心未已如見其肺腑矣至於兵無實額餉多虛冒致海賊肆擾又其貽誤封疆也臣蒞粵兩載具知其父積有功勞諸弟亦小心奉法惟之信悖逆亂常滅絕人理察其近習左右俱憤恨不平因密約都統王國棟等共酌机宜之信旦夕就擒乞

勅議正法以戒天下爲臣而懷二心者國棟亦上疏自述其與金雋尙之璋甯天祚

同心密謀狀之信母舒氏胡氏止疏曰逆  
子尙之信怙惡不悛酗酒肆暴殺害善良  
凌虐官吏甚至奉

命出師頓兵不進私回東省遲誤軍机不  
臣之心久萌謀逆之變可慮恐禍延宗祀  
不禁飲泣寒心密令都統王國棟等選員  
擒之請

旨正法並收禁其妻耿氏子崇溢乞

聖慈垂念先臣忠蓋改令一子襲爵是時  
光祖榜選際盛因武宣新復屯兵城外之  
信入踞城光祖等得國棟檄令兵圍城以  
永祥士選首告罪欵有逮問

旨宣示之信之信就逮還廣州上疏辯謂  
永祥士選以責怨私怨捏欵誣陷諸疏並  
下廷議議削之信爵逮至京鞠訊時藩兵  
八千在廣西有訛言進征雲南卽分置戍

守者多恐懼逃歸

命宜昌阿與賚塔慰遣西征並宣

諭曰前尙之信爲屬員張永祥等首告諸不法事朕欲明其虛實故令來京非以所言皆實必欲治以法也平南藩下官兵本朝豢養四十餘年世受國恩最爲深厚初無欲行解散之心宜釋去嫌疑各保身家妻子以副朕恩養保全之意七月宜昌阿

將逮之信起行藩下長史李天植以發難由國棟白於之信母及其弟副都統之節之璜之瑛誘國棟議事伏兵殺之將軍賚塔率禁旅收捕鞠同謀者自副都統叅領佐領至校卒得百餘人天植自服造謀之信辯弗知護衛田世雄證之信欲殺國棟使告天植讞成馳奏法司核議之信與之節之璜之瑛天植凡同謀者依律擬斬藉

逆目傳 卷一  
三  
沒之信母舒氏胡氏怨國棟代訴之信謀  
逆應坐同謀之孝之璋及諸幼弟雖不同  
謀應草職枷責得

旨平兩王可喜航海歸誠効力行間久鎮  
粵東著有勞績及吳逆反叛堅守臣節不  
肯從逆爲逆子尙之信所迫憤恨殞命朕  
每念及深爲憫惻其妻舒氏胡氏從寬免  
死並免籍沒之孝之璋等免革職枷責皆

令赴京尙之信不忠不孝罪大惡極本當  
如議處斬念其曾授親王姑從寬賜死尙  
之節尙之璜尙之瑛革副都統與李天植  
等俱卽處斬應藉資財留充廣東兵餉是  
年九月之信

賜死廣州永祥士選優叙擢用世雄以不  
先舉發坐杖流

上復傳諭宜旨阿曰尙之信雖經犯法其

妻子不可凌辱應遣人護送還京向聞廣東有大市小市之利經藩下人霸佔可會同巡撫詳察仍歸民間其藩下所收私稅每歲不下數百萬當盡充國賦以佐軍需又各省商販欲倚藩下投入者甚多應察出各復其舊尋命改隸藩下十五佐領於漢軍駐廣東別授將軍副都統轄之之信親屬俱歸旗

嚴自明列傳

嚴自明陝西鳳翔人明叅將

本朝順治元年大兵至陝西自明降二年三月防守漢口招降張獻忠僞將李旺張顛等九月生擒僞將張黑子斬首四百餘陝西總督孟喬芳令率兵收川敗僞先鋒張定邦都統劉孝招降官三十餘員時川西李異德稱明唐王隆武年號自明敗之



復擊斬賀珍餘賊於陽平三年肅親王豪  
格進取四川以自明爲副將駐防川北保  
寧四年招撫權演等於廣元敗趙榮貴於  
劍州梓潼五年二月明桂王總兵譚洪逼  
保寧自明斬獲甚衆四月授保寧總兵加  
都督僉事七年蓬州白蓮教李希先楊允  
等倡亂自明勦擒之八年勦撫萬山寨賊  
趙大光平之加署都督同知十一年改授

永寧總兵十六年九月招降桂王將軍楊  
國明總兵武國用十月擢江西提督叙功  
加左都督康熙七年裁缺九月補廣東提  
督十三年七月潮州總兵劉進忠叛逆党  
陳奠等分據程鄉縣自明分兵擊敗之降  
僞守備張奉寰得

旨嘉獎九月逆藩吳三桂以僞劄遣之自  
明舉首下部議叙十月授三等輕車都尉

世職以其子武進士梅署守備十五年二月  
月尙之信叛應三桂自明從逆十一月糾  
衆逼南康巡撫佟國禎將軍覺羅舒恕等  
敗之破其營十七自明退據南安十六年  
四月致書總督董衛國乞降得

旨嚴自明若悔過歸正來迎王師當赦其  
罪仍前錄用五月自明降後之信亦降疏  
言自明係吳逆舊屬不知軍旅今粵東初

復兵心甫定若復令自明統轄恐兵心未  
能安貼

上命自明以將軍赴廣州閒住尋自明疏  
請回京從之十二月授鑾儀使未幾病死

孫延齡列傳

孫延齡遼東人父龍隨孔有德來歸隸漢  
軍正紅旗授二等男爵

世祖章皇帝時封有德定南王鎮廣西龍

爲部將有德以女四貞字延齡及有德殉  
節桂林龍亦歿於陣

予卹典以延齡襲二等男復加一等雲騎  
尉時四貞尙幼

特賜白金萬兩歲俸視郡主旣長適延齡  
康熙五年五月

聖祖仁皇帝命延齡爲鎮守廣西將軍統  
轄有德所遺部衆駐桂林八月禮部議給

四貞儀從得

旨定南王爲國捐軀又復絕嗣

世祖章皇帝命其女視郡主食俸今請給  
儀從如議行後不爲例時吳三桂以平西  
王爵留鎮雲南凡滇黔官吏悉擅除授延  
齡效之漸驕縱無忌憚十一年九月御史  
馬大士疏劾延齡擅銓武職爲部臣駁奏  
延齡復徇私瀆請乞

賜嚴勅以爲恣肆不臣者戒疏下部察議  
申禁之十二年七月部下都統王永年副  
都統孟一茂參領胡同春李一第等列延  
齡贖款及縱屬殃民城門晝閉鄉民不敢  
入城狀移牒總督金光祖光祖以

聞

上遣侍郎勤德洪赴粵審理御史鞠珣疏  
言延齡職位本微祇因配定南王女是以

命之掌管藩兵終屬外姓無承襲勳臣之  
理乃駐粵以來凌辱職官擅補營員近復  
委其兄孫延基總管部兵軍心未能貼服  
許告紛紛乞

勅延齡還京其部兵或歸隸入旗或仍令  
駐防別遣將軍統轄疏下部確議以延齡  
既爲永年奏劾

特遣大臣往勘應俟讞成再議既而勤德

洪翰既永年等所劾屬寔請治延齡罪得  
旨寬贖十二月吳三桂反  
上以廣西境隣貴州授延齡爲撫蠻將軍  
命與都統線國安固守疆圉會同廣西巡  
撫馬雄鎮提督馬雄禦勦賊寇三桂以逆  
書誘之十三年二月延齡遂據桂林叛殺  
王永年孟一茂胡同春李一第等以兵圍  
巡撫解署執雄鎮及其家屬幽寘之事

聞

詔削延齡職宣

諭中外曰逆賊孫延齡素無才能功績祇  
緣定南王孔有德航海歸誠出師盡節  
世祖章皇帝憫其遺孤不忍分離仍以所  
屬官員統之養贍加恩概從優厚迨朕御  
極念孫延齡既配王女宜量加寵榮故授  
爲將軍使之管理定南王所遺官兵鎮守

西粵在孫延齡叨冒崇階自應恪恭職掌  
殫忠報効乃莅任以來屢有過犯經王永  
年等劾奏贖罪部臣從重處分朕猶以定  
南王之功曲加貸宥仍令管兵如故近復  
賜以撫蛮將軍印委任有加恩寵罔替不  
意其包藏禍心背恩忘義遽結逆賊吳三  
桂徑行反叛國法難容宜加顯戮今削其  
將軍職銜大兵指日進剿立正典刑但念

所管官兵係定南王舊人受恩累朝忠義  
素著必不甘心從逆曠棄前勳其有能斬  
孫延齡投獻軍前者優加爵賞或以兵馬  
城池納款者論功叙錄或力有不逮自拔  
來歸者亦免罪收用至父兄弟現現在京  
城直隸各省者概不株連毋得心懷疑畏  
自懼法網負朕好生之意四月延齡疏言  
滇黔告變臣兩疏具報因桂林重地臣奉

逆日傳  
諭集兵固守屢移咨督臣金光祖居中調  
度提臣馬雄赴省面商機宜不料督提二  
臣誘臣部下都統王永年等謀殺害臣幸  
一朝敗露本旗官兵遂將王永年等剪除  
督臣金光祖以奸計未遂誘臣作叛誑疏  
上  
聞前蒙  
賜臣撫畜將軍

勅印費至肇慶督臣執留不發臣未克祗  
受今衛承之聞滇兵數萬與粵爲隣臣固  
不惜頂踵勉圖報効乃督提二臣視臣如  
讎是棄臣於陷阱之口也此臣不得不伸  
之苦衷惟希

睿鑒疏入

上諭平南王尙可喜及金光祖馬雄曰孫  
延齡奏督提二臣誘其都統王永年謀害

直

卷

三

之故不得已剪除王永年此潛通吳逆飾  
詞誣奏耳然孫延齡雖叛其所部兵曾隨  
定南王効力國家豢養有年恐大兵至日  
概行誅戮朕心有所不忍前有旨如孫延  
齡改過來降亦從寬宥尔等不可以此遂  
緩進勦必孫延齡果悔罪歸誠乃受降具  
奏又

論可喜光祖等曰孫延齡有可勦之勢卽

議進勦若未可速進則俟大兵到粵協力  
勦滅是時逆藩耿精忠自福建寇掠江西  
三桂歸湖南諸郡糾賊犯袁州吉安大兵  
與賊相持未能達粵延齡遂自稱安遠大  
將軍移牒平樂梧州諸郡煽誘從逆未幾  
馬雄亦叛附三桂線國安病死粵西守土  
文武官或望大兵赴援或被羣賊脅從不  
復與延齡爲敵三桂徧給僞印以叛党傳



奇棟爲僞巡撫李迎春爲僞布政使程可則爲僞按察使孫延齡招致萬羊山賊衆叅以舊軍分設五鎮每鎮兵二千縱之寇擾近邑旋僭稱安遠王有傳宏烈者舊爲慶陽知府當三桂未反時舉發三桂不職事坐誣謫戍蒼梧孫延齡旣叛宏烈欲假事權集兵圖恢復受三桂僞職爲信勝將軍與延齡交善數以大義陳說延齡猶豫

未決妻四貞約宏烈往迎大兵至卽反正十六年宏烈迎大兵於口西先致書將軍舒恕言四貞欲延齡歸順曾告宏烈謂無刻不以

隆恩豢養爲念若

賜赦赦延齡罪封四貞爲郡主則粵西可定舒恕以情入奏

詔督捕理事官麻勒吉相機招撫授傅宏

烈廣西巡撫令大兵進征先是三桂屢勸延齡助寇湖南延齡以部眾不從報謝至是將歸順爲三桂偵知使從孫世琮糾賊逼桂林誘執延齡殺之四貞善騎射能殺賊賊相戒無犯留僞將軍李廷棟於桂林通聲援凡延齡部眾聽其舊將統之世琮別掠平樂潯州橫州南寧爲大兵所敗中傷死宏烈至平樂延齡舊將劉彥明徐洪

鎮徐上達等擒斬李廷棟逐走賊眾借線圖安子成仁率桂林官吏兵民歸順四貞還京師

馬雄列傳 子承蔭 郭義附

馬雄陝西固原人廣西提督馬蛟麟之族子蛟麟撫爲子順治八年襲一等輕車都尉世職九年充定南王標下左翼總兵官十年叙隨征湖南廣西軍功加都督同知

十一年九月授二等男鎮守廣西時明桂  
王朱由榔據安隆遣其將李定國擾南寧  
十一年定國合其党李先芳廖鳳等距藤  
縣雄擊破之擒其所授知府江炎十三年  
二月靖南王耿繼茂兵抵南寧定國奔南  
安雄追擒其陽春伯李先芳斬其叅將杜  
紀俘獲無算四月加右都督十五年定國  
遣其党閻維龍趙延生等陷橫州防守都

司趙連城退屯貴縣雄率兵馳援維龍等  
棄城遁遂復橫州十六年加雲騎尉世職  
十七年廣東巡按御史張問政劾雄庇商  
抗課欠鹽餉部議降二級照舊管事十八  
年授廣西提督康熙十三年二月孫延齡  
叛應吳三桂廣西震動雄邀執三桂僞官  
左江鎮總兵官郭義亦舉首三桂逆書得  
旨嘉獎義福建海澄人先由海道來降以

湖廣鄖陽鎮總兵移鎮左江至是偕雄同  
守柳州

上諭馬雄等曰保固粵西寔爾等是賴今  
大兵已抵武昌倘賊兵犯武岡寶慶尔等  
率所部官兵進勦其後大兵迎擊於前自  
可尅期撲滅尙其謀定後舉以副朕倚任  
至意六月雄疏言延齡賊衆不下萬餘臣  
雖堅守柳州衆寡不敵乞發兵應援

上命平南王尙可喜總督金光祖酌發廣  
東兵赴援九月雄及郭義俱叛降三桂于  
是廣西全陷十五年二月雄因高雷兵變  
率賊犯廣東連陷州縣未幾尙之信叛廣  
東全陷十一月義徭廣東從遊提督嚴自  
明進逼南康連兵十七營江西巡撫佟國  
楨將軍舒恕等擊敗之義等退據南安十  
六年五月將軍莽依圖進攻南安自明以

城降義走廣西先是撫遠大將軍圖海疏  
言馬雄陷賊其母及族人俱在固原今雄  
母欲令其孫承先持書赴廣西招降

詔給承先遊擊銜遣赴廣西旋

命督捕理事官麻勒吉齋勅赴簡親王喇  
布軍前

諭馬雄曰尔世受國恩鎮守西粵勞績素  
著自吳三桂孫延齡相繼背叛整兵防禦

力保孤城邊執僞差矢心報國之忠貞朕  
久洞悉後緣賊氛逼近援絕勢單當力難  
持守之時爲暫尔自全之計茲各路大兵  
勦撫並用每念粵西變叛各官陷賊自拔  
無由以尔褫忠有素追念前勞尤深軫惻  
今特頒專敕宜諭尔等果翻然悔悟棄逆  
効順將尔已往之罪並所屬官兵悉行赦  
免若能勦寇立功仍加恩優叙爾其無懷

疑懼以負朕篤念勳舊至意十七年正月  
將軍莽依圖疏言雄病死於雜峇  
諭麻勒吉等曰馬雄雖死其餘黨尙踞粵  
西着仍隨簡親王偕行以昭朕赦罪論功  
之意時尙之信已歸順隨大兵進討廣西  
十八年六月之信奏雄子馬承廕率僞將  
軍郭義及僞文武官繳勅印來降八月承  
廕請効力自贖

論曰原任廣西提督馬雄之子承廕不忘  
國恩歸誠可嘉應授承廕伯爵給與將軍  
敕印隨大兵勦賊其同來歸附文武官弁  
酌量給劄以示鼓勵旋給義總兵銜協守  
南寧僞將軍吳世琮犯南寧築長圍守之  
城中食且盡義嚴守備乘間出戰賊屢却  
而復合會將軍舒恕來援義出城策應大  
破賊兵世琮負重傷遁將軍莽依圖疏言

義固守南寧非他人歸誠者比請仍授左  
江總兵官從之十九年正月承廕標兵以  
缺餉謙簡親王喇布戢之承廕言於簡親  
王以舊設五營兵少請增援勦二營營各  
千人喇布以聞

諭曰將軍標下無設七營例馬承廕仍立  
五營兵五千叅將守備各官聽其選擇會  
勦雲貴二月承廕復反給傳宏烈登舟遣

兵襲破其營簡親王喇布還保桂林

上命湖廣綠旗兵二千速赴簡親王軍前  
協勦五月總督金光祖擊承廕於武宣敗  
之將軍莽依圖又敗之於陶登六月簡親  
王喇布至雒容進取柳州承廕率僞文武  
官弁詣軍門降

諭曰初馬承廕及所部兵皆叛蹂躪江土  
擾掠生民罪惡已極後見湖南平定廣西

恢復窮迫請降朕欲生民早獲寧息悉貫前罪封以伯爵授爲將軍仍令管兵標員亦分營補用及大兵窺取雲貴無故背恩復叛致誤征討大事今因兵敗勢蹙窘急歸降其押解來京承廕逮至京論死御史孫必振忝奏郭義應連坐

諭曰近日言官忝奏郭義朕念從賊者前既有旨寬宥又加誅戮于前旨未符朕于

大惡決不輕恕其餘若盡論誅不太甚乎凡隨從失節者令革職放回原籍以示寬典義還籍尋死

### 線國安列傳

線國安遼東人隨定南王孔有德來歸隸漢軍正紅旂崇德元年授二等男爵隨征海外各島及朝鮮順治元年從大軍入山海關擊走流賊李自成二年隨有德破自



成于潼關授定南王前鋒統領移師下揚  
州渡江克江陰縣三年自成死餘党李錦  
郝搖旂等分據湖廣國安隨有德至岳州  
督兵征長沙衡州永州寶慶所向克捷時  
明桂王朱由榔與其將胡一青等由武岡  
竄桂林其貴溪王朱常淓恢武伯向登伍  
章平伯周金湯萬安伯張士舉樂平伯蓋  
遇時與平伯牛萬才軍門黃順祖向文明

總兵林國瑞等猶擁眾據湖南聞有德奉  
命專征國安從五年二月克沅州擒常淓  
登伍進攻辰州及石扞思南平溪清浪皆  
下之擢定南王左翼總兵加都督同知七  
年正月克新田縣斬金湯二月克新寧縣  
擒順祖國瑞降文明四月克桂陽降士舉  
遇時八月克黃陽山斬萬才進攻桂林克  
之由榔遁八年二月連克柳州梧州潯州

平樂南寧太平等府廣西平有德鎮桂林  
命國安分駐南寧九年擢廣西提督會李  
定國糾衆陷桂林有德死之國安家屬遇  
害平樂梧州潯州繼陷國安率兵復梧州  
又偕左翼總兵馬雄右翼總兵全節復潯  
州遣遊擊戴成功等復平樂留雄守十年  
正月偕全節復桂林四月一青糾衆數萬  
來犯國安拒之斬級三千生擒二百五十

餘城得全收集難丁家口二千一百九十  
餘給衣食安置投誠弁兵給衣米叙功加  
左都督七月定國復犯桂林諸郡縣多騷  
動國安悉力守戰獲其賊衆火藥定國敗  
遁

上嘉其功加太子太保十一年九月封三  
等伯授衆官總領駐鎮桂林十二月由象  
武追定國至界化土司復賓州橫州潯州

南寧思恩太平等府十二年四月給征蠻  
將軍印統攝搖撻五月回桂林九月  
賜鞍馬弓矢十五年正月

命同征南將軍卓布泰取貴州四月由慶  
遠復柳州之融縣懷遠羅城慶遠之天河  
荔波河池南丹六月抵貴州獨山州進趨  
都勻降定國衆數萬十一月由羅延河追  
至羅田斬獲無算越日大敗定國於涼水

并又敗之水寨山口定國遁復安隆新城  
十一年正月同三路大兵取雲南二月追  
剿定國至永昌騰越戰磨盤山大破之定  
國遁入南甸遂駐沙木河督造浮橋三月  
旋雲南省城七月奉

旨班師回粵十二月靖南王耿繼茂移鎮  
廣西

諭國安寧所部來京十七年二月

命爲廣東都統四月

諭兵部廣西岩疆當厚集兵力鎮守都統  
線國安免赴廣東統領定藩下官兵駐鎮  
廣西應行事宜速議具奏尋議國安應以  
都統太子太保三等伯鎮守廣西加征蠻  
將軍總管定藩下官兵再撥與綠旗兵三  
千駐桂林得

旨線國安授廣西等處鎮守征蠻將軍康

熙五年以老乞休從之十二年逆藩吳三

桂反廣西鄰貴州

上以國安素得軍心授都統與將軍孫延  
齡提督馬雄固守禦賊十三年二月延齡  
據桂林叛國安與雄相繼從賊十五年奉  
旨馮雄屢請援師因不卽至勢迫從賊線  
國安爲孫延齡逼叛伊等皆受國家厚恩  
大將軍簡親王酌議遣人招撫

遣督捕理事官麻勒吉賚

救招之未抵桂林國安病死子成仁同延齡偽將軍劉彥明等歸順

姜瓖列傳

姜瓖陝西榆林人明宣化鎮總兵流賊李自成至居庸關瓖迎降

本朝順治元年五月睿親王多爾袞定京師瓖乘机入大同殺流賊偽總兵張天林

柯天相據寧武代州沿邊諸邑奉表投誠

睿親王令管總兵事瓖請以明棗嶺三裔

朱鼎珊嗣藩大同奉明宗祀睿親王切睿之八月

命佩征西前將軍印鎮大同十二月隨英

親王阿濟格征陝西保德寧武界斷流賊

根道榆林東西各堡聞風歸順英親王以

瓖統攝宣化大同諸鎮兵馬招撫屬邑二

附

年正月僞總兵高一功自延安出犯保德  
寧武瓌率所部並調蒙古兵迎擊斬獲無  
算一功遁去六月入

覲尋還鎮五年十一月喀爾喀部衆入邊  
上遣英親王同端重親王博洛等統兵  
防大同總督耿惇率司道各官出城儲餉  
芻糧瓌聞大兵至疑襲已遂據城叛惇奔  
陽和瓌殺其家屬殆盡十二月僞稱大將

軍易冠服遣其黨姚安入朔州明廢官萬  
練乘寢襲踞偏關瓌卽以練爲僞偏關道  
寧武岢嵐保德相繼失守劉遷者亦明廢  
弁也糾亡命受僞左大將軍職畧雁門關  
及代州繁峙五臺等邑太原告警巡撫祝  
世昌連疏請兵

上遣都統巴顏副都統鄂洛索臣率禁旅  
赴英親王軍合圍大同先齎

救諭瑗曰前因有事蒙古故命王等來大同如果尔等有罪當誅安用此詭計爲此必有奸人煽惑離間如能悔罪歸誠仍當宥過恩養瑗負固如故復遣其党姚舉等四出劫掠明叅將王永強據榆林與瑗通謀自稱招撫大將軍殺延綬巡撫王正志及靖邊道夏時芳等窺西安六年正月  
上遣敬謹親王尼堪鎮國公喀爾楚渾輔

國公穆爾祐率禁旅赴太原都統庫魯克阿賚分兵敗賊于石嶺關賊退據忻州復進克之追勦賊衆屢捷斬僞巡撫姜輝三月睿親王統兵出居庸關拔渾源州進薄大同城遣諭瑗降許自新瑗乃託言軍民脅之起事欲以自解請免罪王怒其欺謾益治攻具會豫親王多鐸薨睿親王還京賊援兵五千餘由大同北山至立兩營逼

我軍璜亦率千餘騎出城搏戰端重親王親督護軍統領鰲拜及諸將分兵擊破之璜賊入城是時都統李國翰等已擊敗王永強于同官延綏諸逆漸平廢官李建泰等尙與璜遙應四月大軍克左衛上遣貝子務達海等至軍中更代英親王入京五月萬練劉清復由清涼徐溝分道犯太原署副都統洛碩卦喇等率駐防兵




與祝世昌合擊八月遷敗走黃昏寨大兵圍破之遷伏誅偏關岢嵐相繼克復練自焚死餘賊爲大軍所殺及自拔來歸者甚衆璜勢日窮蹙

上仍命英親王往圍大同城中食盡死傷枕藉僞總兵楊震威及僞官裴季中等謀斬璜並其兄琳弟有光首出降遂復大同明年建泰等亦伏誅



李建泰列傳

李建泰山西曲沃人明天啟五年進士官  
至大學士崇禎末自督師西剿流寇及京  
師陷建泰率殘卒數百輦餉銀入保定城  
城敗亦厲建泰倡言曰勢不支矣姑與  
議降壽牒迨署知府邵宗元用印宗元不  
從建泰中軍副將郭宗杰等內應賊城陷  
建泰出降順治二年三月



庫 文 閣 内			
二 九 〇 函		三 三 〇 冊	淡
三 架	二 〇 冊	〇 冊	書
		號	類